



浙江通志卷三十一

官師志第五之十一

唐仲友字與政金華人父堯臣爲侍御史以直言稱
仲友博極群書登紹興進士復中宏詞科累官判建
康府論時政上納其言再轉知台州興利除害政聲
燁然俄爲奸民所訟時朱熹提舉浙東力劾罷之主
管建寧武夷山冲道觀開席授徒學者雲集所著有
六經解諸史精義群書新錄二百餘卷文集四十卷
兄仲溫仲義皆紹興進士

趙汝愚字子直憲王元佐七世孫擢進士第一孝宗

朝陳自治之策淳熙二年以左奉議郎知台州遷秘書少監兼權給事中孝宗崩光宗立拜右丞相光宗又得疾中外危疑汝愚奮不顧身遣韓侂胄請于憲聖率百官詣大行前奏光宗疾未能執喪乞立皇子嘉王爲太子以繫人心憲聖允諾嘉王卽帝位是爲寧宗尊光宗爲太上皇收召名士以朱熹待制經筵時侂胄恃定策功要重賞汝愚故抑之朱熹白汝愚當以厚賞酬勞勿使預政汝愚謂其易制不爲慮侂胄日夜謀引其黨爲臺諫以擯汝愚盡疏當時賢者姓名指爲汝愚之黨遂罷右相除觀文殿學士知

謚忠定

公諱字子宜温州人乾道進士紹熙五年知杭州汝愚多以政務咨訪與汝愚畝內禪後爲韓侂胄所怨責惠州團練卒謚忠文

葛邲字楚輔吳興人乾道初知崇德縣以循良稱慶元元年以觀文殿大學士判紹興府簡稽期會錢穀刑獄必親或謂大臣均佚有體邲曰崇大體而簡細務吾不爲也

李直養字無害廣陵人待制正己孫也正己嘗寓家海鹽淳熙間直養爲丞其縣甚著名蹟紹熙初攝華

亭部使者以才薦特改爲海鹽令初涇縣遭大旱直
養禱之得雨百姓歌頌修起學校延教諭朱沆爲師
嚴督章程誦絃相聞置鄉底堰八十餘所及長豐關
又自藍田廟開浦一十八里至鮑郎場以便鹽運民
被其利

黃度字文叔新昌人以進士知嘉興縣遷監察御史
嘗言吳挺死其子曦必納賂求襲恐爲他日患光宗
以疾不過重華宮度上書力諫又與臺諫劾內傳陳
源楊舜卿林億年三人爲今日禍根至比之唐之李
輔國寧宗卽位詔改右正言韓侂胄用事丞相留正

去國侂胄知度嘗與正論事不合欲諷使擠之度語
同列曰丞相已去擠之易耳然長小人聲燄可乎侂
胄驟竊政柄以意所好惡爲威福度具疏將論其姦
爲侂胄所覺遽除度直顯謨閣知平江府卒度能推
明所學務引君以當道可謂進退裕如矣

楊萬里字廷秀吉州人紹興進士調永州零陵丞遷
臨安府教授進煥章閣待制孝宗時韓侂胄用事欲
網羅名士嘗築南園屬萬里爲記許以掖垣萬里曰
官可棄記不可作也因忤侂胄自是家居十五年家
人知其憂國凡邸報時政皆不以告後聞韓侂胄用

兵憂憤而卒所著有易傳文贈行世學者稱爲誠齋先生

陸九淵字子靜撫州人乾道八年進士歷官將作監丞主管台州崇道觀時朱熹之學盛行于台學者頗涉支離九淵心悟理融出於自得每一論學則指示本心一貫無二大闢榛蕪直撤迷障台人如趙然道趙詠道輩咸知所趨向而朱子亦自謂向來太涉支離不若默會諸心以立其本始雖論辨終會於同於是知子靜之學之非禪而繼往開來之功不可誣矣子靜樂貴溪之象山廬于其上學者稱爲象山先生

云

朱熹字元晦一字仲晦徽州婺源人紹興十八年進士浙東大饑宰相王淮奏改熹提舉浙東常平茶鹽公事熹始拜命卽移書他郡募米商蠲其征及至則客舟之米已輻輳熹日鈎訪民隱按行境內單車屏徒從所至人不及知郡縣官吏憚其風采至自引去所部肅然凡丁錢和買役法權酷之政有不便於民者悉釐革之救荒之餘隨事處畫必爲經久之計知台州唐仲友與王淮同里爲姻家遷江西提刑未行熹行部至台訟仲友者紛然按得其實章三上淮匿

不以聞熹論愈力仲友亦自辯淮乃以熹章進呈熹章前後六上淮不得已奪仲友江西新命以授熹辭不拜遂歸且乞奉祠嘉泰初學禁稍弛熹已致仕後侂胄死詔賜熹遺表恩澤謚日文詳具宋史道學傳中

黃幹字直卿閩縣人朱子門人監石門酒庫不卑其官盡心所事具言監官勒錢本乞於提領裁留防漏節費爲犒賞諸庫法嘗著酒器五銘寓警安撫吳獵知其賢辟主激賞酒庫終知慶安府謚文肅

黃灝字商伯都昌人進士歷太府丞知秀州兼提舉

浙西常平州大饑海鹽尤甚有食其子持一臂行丐者朝旨停閣夏稅灝乃更請閣秋苗不俟報行之言者罪其專移灝筠州仍削兩秩而從其請州人尸祝之灝歸里中幅巾深衣騎蹇驢遊行山間若素隱者後起知信州終廣西運判謚文簡

王介字元石金華人紹熙初進士授昭慶軍判官寧宗立韓侂胄出入禁中時猶未肆而文墨議論之士陰附之以希進介力攻其非坐是出判紹興諫官姚愈希侂胄旨劾介與袁燮皆僞學之黨或勸其自明介曰吾髮已種種豈爲鼠輩所伎邪會不雨乞策免

宰相史彌遠出知嘉興府改慶元卒謚忠簡子塋嘉定進士累官禮部尚書

鞏豐字仲至武義人從呂祖謙游淳熙辛丑以太學上舍對策高第教授漢陽軍遭母喪免復授浙東提刑司幹辦會改法本路人不許爲監司屬官遷幹辦福建帥司公事後知臨安縣政尚寬簡吏民信化刑罰哀息尋以祠祿罷卒年七十豐挾竒才人謂宜居館閣中秘而徘徊下列人多惜之

葉秀發字茂叔金華人秀發師事呂祖謙唐仲友明性理之學擢慶元丙辰進士弟子之從學者歲數百

人秘授福州長溪簿丁父憂服除轉慶元府學教授秀發嘗著論語講義以誨諸弟子且曰聖門授業之源無過此書然義理無窮倘一切沿襲舊說吾心終無所得若欲見諸行事是猶假他人之器以爲用用之於已且惴惴焉不以爲便况欲假人乎哉時鉅儒樓鑰鄭性之楊簡袁燮皆器秀發與之交而於簡問難尤切每至日昃忘食簡自謂有所啓發得邊詹顧葉四子爲喜葉蓋指秀發也後爲桐城丞及知休寧縣高郵軍皆有異政更多竒節詳見宋濂集雜傳中薛極字會之武進人性敏讀書日記萬言寧宗朝以

父蔭補上元主簿中博臺宏詞科爲大理評事通判
溫州以文學政事見推于時遷桐川郡守丐祠不允
嘉定初以叅知政事樓鑰薦召爲左右司樞密副都
承旨時日食迭見大火頻仍朝廷鮮有言者獨上修
德弭災之疏言甚懇切語在宋史本傳中進刑部侍
郎兼檢正補偏救敝力扶顛危更楮幣創安邊司凡
有益于時事者竭誠爲之歷進吏部尚書簽書樞密
院事尋遷叅知政事除樞密使封和國公立朝三十
餘年多所裨益因與史彌遠同相外合中離事多抵
牾忽忽不樂屢疏乞休以觀文殿大學士致仕建別

業于橫山南十里野服以終其身後人科第相仍
張鎮字深父秦之二陽人父宗元敷文閣待制鎮以
恩任承事郎歷兩浙轉運幕委明州造船人或言其
非勲閥所宜處鎮謝曰晁以道先生所嘗爲也吾處
之懼弗稱敢薄之耶訖代去不以卑冗怠事時屬文
辭見志然未嘗妄出以示人所居帷屏壁門皆有銘
以自警

程九萬知武康縣下車首訪儒術頌民姦宄繩之以
法境內肅清秩滿去任邑人攀餞閭巷爲空
錢可則字正已天台人知睦州二年秋十月浙右大

水粟價騰踴可則亟發廩賑之諭俗儲蓄運糴移檄
旁郡弛糴禁平市價民以全活

姚希得知慶元府兼沿海制置使廣募水軍造戰艦
蓄糧食蠲舊逋二百萬甚有善政

林大中字和叔永康人舉進士歷官侍御史奏言進
退人才當觀其趨向之大體不當責其行事之小節
趨向果正雖小節可責不失爲君子趨向不正雖小
節可喜不失爲小人尋忤韓侂胄出知慶元府城南
民田潮溢不可種大中指公帑治石築之民不知役
而蒙其利郡訛言夜有妖大中謂此必黠賊所爲立

中黜之人情遂安乞祠得請乃爲給事許及之御史
林采論列罷歸

曹豳字西士温州瑞安縣人舉嘉泰二年進士授安
吉州教授郡守度正欲薦之豳辭曰章司錄母老請
先之正敬嘆改知建昌縣建齋舍以處諸生擢秘書
丞出爲浙西提舉常平面陳和糴折納之弊建虎丘
書院以祀尹焞移浙東提點刑獄寒食放囚歸祀其
先囚感泣如期至召爲左司諫與王萬郭磊卿徐清
叟俱負直聲當時號嘉熙四諫

汪季良江西廣信人開禧二年知平陽縣治政寬恕

立十事諭民其目曰親父子和兄弟謹夫婦明君臣
善朋友視疾病早安厝嚴繼絕保本業戒鬪訟凡數
千言曲盡人情法理修塘埭斗門以興水利民甚便
之

陳騫字叔進臨海人紹興中試春官第一累將作少
監尹臨安歷知秀州光宗時爲吏部侍郎應詔上疏
皆切時病寧宗時知樞密院事兼叅知政事後知婺
州卒贈少傅謚文簡

岳珂彰德人飛季子霖之子也嘉定間守嘉興有惠
政念其祖武穆王爲秦檜所陷政暇輒屏居郡治西

北偏金陀坊著額天辨証大定每金陀粹編及
錄程史諸書

楊長儒嘉定間知湖州夙夜盡瘁清獄訟折強橫境
內晏然稱爲神明治聲聞於四方

趙與權字悅道燕懿王八世孫嘉定七年進士知安
吉州緩征權寬禁網以理化民調會稽尉善政敷洽
改建寧司戶叅軍中明法科尋知臨安府浙西安撫
使與權上言導民有本如臣待罪天府豈遽能及民
惟其真實相孚待以不擾則人心本善有感必從或
謂厲以威待以術者皆非知本之論也遷戶部侍郎

兼權兵部尚書論邊事至爲深切累丐祠不許論楮幣自嘉定以一易二失信天下開禧嘗以二當三何救於楮且曰士大夫不清白奉法雖日易一法無救於楮而國非其國矣法削國弱能獨享富貴乎端平以來每諭竄賊吏禁苞苴戒奔兢戢橫歛而風俗沉痾自若或口仁義而身市井率以欺君爲常肥家爲樂遂臨事乏使而小人得從旁乘間竊取官爵矣遷吏部尚書力求歸田會潮汐齧隄執政道帝意留治之授端明殿學士知臨安府浙西安撫使江隄峻會嘗端明殿學士提舉萬壽觀會饑民相携溺死

臨安府事與權涕泣奉詔上則祈哀公朝下則推誠勸分甘雨隨至米商來集流移至者有以濟之力求納祿授資政殿學士提舉萬壽觀與權至浙江上召還卽日絕江去帝爲悵然與權三爲府尹盡力民事都人稱趙端明必以手加額久之以舊職知温州政事必親吏不敢欺荆水砦修貢院以侍讀召辭不許入對言爵祿之濫因及國本事五丐歸又不許進春秋解薦大學生六十人史嵩之將復入相而人言不已帝以問與權言嵩之老師費財私暱貪富過立名譽必不宜復用時嵩之猶子璟卿誦言其過忽

斃而杜範劉漢弼徐元杰三賢暴死人皆疑嵩之致
毒與權請優恤漢弼元杰等家帝從之而請優恤手
詔則與權所擬入也時相忌之尋授安德軍節度使
開府儀同三司萬壽觀使日食應詔言事益切月賜
內帑與權辭不取五乞免朝請三乞致仕俱不允賜
泰卦詩忠邪辨自是軍國大事皆縷縷言之有不勝
書蓋其愛君憂國本諸天性拜少傅卒遺表猶不亡
規正手注六經及奏議詩文百卷與權嘗謂士大夫
有貪聲則雖竒才奧學徒以嘉國害民爾故其卒
之夕而金帶猶質錢民家云

吳淵字道父秘閣修撰柔勝之第三子也幼端重寡
言苦志力學五歲喪母哭泣哀慕如成人嘉定七年
舉進士調建德縣主簿丞相史彌遠謂淵曰君國器
也今開化新置尉即日可上欲以此處君淵對曰甫
得一官何敢躁進况家有嚴君所當稟命彌遠爲之
改容吟浙東制置使司幹辦公事丁父憂詔以前
職起復力辭弗許再辭且貽書政府曰人道莫大於
事親事親莫大於送死苟冒哀求榮則平生大節已
掃地矣他日何以事君時丞相史嵩之方起復或曰
得無礙時宰乎淵弗顧詔從之服除差浙東提舉茶

鹽司幹辦公事

李子筠爲餘姚主簿號李水晶初有茶商航海與海舶相遭更相疑爲盜鉦鼓交鳴格鬪殺傷十餘人繫理蕭山吏求主名不能得連歲年不決時趙抃守越檄子筠治之子筠曰犯時不知在律勿問具聞于州杖而遣之抃以爲處議當於法也甚任之

趙崇嶠南豐人嘉定間爲石城令時寇賊橫虐崇嶠以恩信結將士討除元惡改淳安縣上疏極論中人專橫官至朝散大夫有奏議白雲藁

黃當字子耕分寧人嘗從朱熹學以道自任必反覆

論辨無疑後止舉太學進士監文思院管不樂仕進求外出知台州通判處州酌免逋負尋知台州先勸後禁訟牒清簡謝良佐子孫居台者播越流落管求之民間收而教之所著有復齋集

司馬揪字仲舉嘉定初知遂昌撫字教化愛民如子旣去民思慕之

牟子才字存叟井研人擢史館檢閱入對首言大臣不公不和六事次陳備邊三策理宗顧問甚悉將下殿復召與語翊日帝諭宰相曰人才如此可峻擢之左丞相李宗勉擬秘書郎左丞相史嵩之怨子才言

已遽曰姑遷校勘俄宗勉卒嵩之獨相亟請外通判
吉州轉衢州值日食詔求言上封事萬言極陳時政
得失後入直學士院所著有存齋集內外制四朝史
稿子獻居湖州官至大理少卿

徐邦憲字文子義烏人紹熙中試禮部第一登進士
第三遷秘書郎韓侂胄開兵端同時附和無敢發一
語邦憲獨首言之乞外知處州陛辭力諫用兵不可
太驟再歲召還尋知臨安府不爲勢利所移

呂午字伯可歙縣人嘉定四年進士授烏程主簿郡
守致之幕下事一決於午守張忠恕丞相浚之孫薦

酒力屬當途今忤丞相史彌遠罷去尋又監溫
天宮北監鹽場改知餘杭縣又以言罷公論大不平
然午自此名益重後遷兩浙轉運司主管文字移浙
東提刑史嵩之嗾董復亨論罷中外不直嵩之尋再
移浙東提刑復爲監察御史入見帝曰卿向來議論
甚明切命兼崇政殿說書累贈至華文閣學士通奉
大夫子沆

吳昌裔字季永中江人嘉定七年進士聞漢陽守黃
榦得朱熹之學往從之爲眉州教授士習丕變至和
中拜監察御史彈劾無所避出爲浙東提刑改知婺

州值發告旱乃減騶從供帳遣僚佐召邑令循行阡陌蠲粟八萬石錢二十五萬緡大蘇民困初與徐靖叟杜範同日入臺四方想聞風采人稱至和三諫不閱月遂遷莫不悅惜云

陳埜字子爽嘉興人歷官浙西提點刑獄知慶元府兼沿海制置副使遷知婺州所至興學好士以名義爲重軍民愛戴之

張忠恕字行父右僕射浚之孫開禧末入爲籍田令

太廟鴟吻爲雷雨所壞神主遷御忠恕因輪對請下情寧宗嘉納嘉定五年進太府丞出知

湖州魏了翁嘗勉忠恕以植立名節無潰家聲及是嘆曰忠獻有後矣忠恕又因論對引以伯父栻告孝宗之語曰當求曉事之臣不求辦事之臣欲求伏節死義之臣必求犯顏敢諫之臣語益剴切忠恕自知不爲時所容力請外補遂以直秘閣知贛州抵郡纔兩月言者指爲朋比落職降兩官罷魏了翁嘗許忠恕拳拳體國似浚撥繁劇似其父於斂華就實則有志義理之學嘗有聞乎栻之教矣

趙師辨字從善宗室燕懿王之系慶元四年知臨安府韓侂胄生日百官爭貢珍異師辨最後至出小合

日願獻少果楨侑觴荅之乃粟金蒲桃小架上綴大
珠百餘顆衆慙沮侂胄有愛妾張譚王陳四人皆封
郡夫人其以有名位者又十人或獻北珠冠四枚於
侂胄侂胄以遺四夫人其十人亦欲之未有以應也
師彞聞之亟市北珠製十冠以獻十人者喜爲求遷
官拜工部侍郎侂胄嘗與衆客飲南園過山莊顧竹
籬草舍曰此真田舍間氣象但欠犬吠雞鳴耳俄聞
犬嗥叢薄視之乃師彞也侂胄大笑侂胄將用兵師
彞度侂胄必召禍乃持異論後侂胄黨多坐謫師彞
乃獲免

程松字冬老池州青陽人舉進士爲湖州長興尉慶
元中調知錢塘縣時韓侂胄用事其門客吳曦爲殿
帥松諂事曦以結侂胄侂胄喜怒不常偶以小故出
愛姬松聞以百千緡市姬盛供帳舍諸中堂夫婦奉
之加謹居無何侂胄意解復召姬姬具言松謹待之
意侂胄大喜除松幹辦行在諸軍審計司守太府寺
丞未閱旬遷監察御史擢右正言時臺諫有識者耻
與松同列松侈然自以爲榮

程秘字懷古徽州休寧人紹熙四年進士授昌化主
簿改富陽令歷秘書監遷江東轉運判官陞辭寧宗

謂宰臣曰程秘豈可容其補外遂復舊職遷浙西提
舉常平以端明殿學士致仕初秘直學士院時寧宗
崩丞相史彌遠夜召秘舉家大驚秘妻丞相王淮女
也泣涕疑有不測使人矚之知彌遠出迎而後收涕
彌遠與秘同入禁中草矯詔一夕爲制誥七十有五
彌遠初許秘政府旣楊皇后緘金一囊賜秘秘受之
不辭歸視之其直不貲彌遠以是銜之卒不與共政
云

璘字伯玉古田人嘉定十年舉進士時臺臣李安
次對官不許論邊事璘對策極詆之曰吾

於天子之庭乎遂出知嘉興府璘立臺僅百日
躬盡言無隱上嚴憚之世謂唐介再見及在
郡侃侃正直不徇人以非禮之恭嘉興士習亦爲之
少變云

徐鹿卿字德夫豐城人嘉定進士調南安軍教授嘗
應詔上封事真德秀稱其氣平論正有憂愛誠心時
宰相以甘言誘鹿卿退語人曰是牢籠也吾不能爲
宰相私人竟以事出主雲臺觀越月起爲江東轉運
判官歲大饑人相食鹿卿設法賑救全活甚衆隨移
浙東提點刑獄丞相史彌遠之弟通判温州利韓世

忠家寶玩籍之鹿卿奏削其官
熙三年以右司召丞相杜範遺書促之廼出進華文閣待制卒所著有泉谷文集奏議講義鹽楮議政稿歷官對越集手編漢唐文類文苑菁華謚清正

范應鈴字旂叟豐城人自少厲志于學開禧元年舉進士入見首言今以朝行暮改之規模欲變累年上玩下慢之積習以悠悠內治之敝政欲圖一旦赫赫外攘之大功又曰公論不出於君子而參以逢君之小人紀綱不正於朝廷而牽於弄權之闒寺言皆讜直識者避之尋爲浙東提點刑獄力乞便養改

西提舉常平所著有西堂雜著十卷斷訟語曰對越集四十九卷徐鹿卿曰應鈴經術似兒寬決獄似雋不疑治民似龔遂風采似范滂理財似劉晏而正大過之人以爲名言

牛大年字隆叟揚州人慶元二年進士入對言人主居富貴崇高之位重而承宗社之托尊而爲臣辟之戴一指意而衆莫敢違一動作而人莫敢議然而天心靡常則可畏也又言今日士氣久靡宜體立國之意以振起之夫有扶持作興之意而後縉紳無貪名嗜利之習無貪名嗜利之習而後有持正秉義之操

國家之休戚在士大夫之風俗而風俗之善惡在朝廷惟陛下爲之振起機括一運天下轉移而風俗易矣歷遷工部郎官入對請懲貪吏進直華文閣兼浙東提點刑獄清操凜然所至以廉潔自將

鄭穎壽昌人嘉定間登第爲理官執法平允時相開邊薦參謀官知政事穎抗論政府非賞功之地命遂寢出守嘉興乞歸闢一室以居杜門不出

劉漢弼字正甫上虞人嘉定九年進士歷官著作佐郎知嘉興府漢弼學明義理之辨居官論事皆切時務後爲御史論史嵩之起復及姦邪未盡屏汰抱忠

以死

趙汝暨新建人仕爲明州錄事參軍時有執平民爲殺人盜者汝暨直其寃繼獲真盜豫章守貪剽宣撫趙葵薦汝暨知鄉郡民始安且有拓境之功善政具舉進刑部尚書轉工部致仕

鄭丙字少融福州長樂人紹興十五年進士積官至吏部尚書浙東提舉朱熹部至台州奏台守唐仲友不法事宰相王淮庇之熹章十上丙雅厚仲友直迎合宰相意奏近世士大夫有所謂道學者欺世盜名不宜信用蓋指熹也於是監察御史陳賈奏道學

之徒假名以濟其僞乞擯斥勿用道學之日丙倡賈和
和其後爲慶元學禁善類被厄丙罪爲多

陸持之字伯微臨川人九淵之子也七歲能爲文九
淵授徒象山之上學者數百人有未達者持之爲敷
繹之著書十篇名懃說嘉定初袁燮薦于朝謂持之
議論不爲空言緩急有可倚仗嘉定間寧宗特詔持
之秘書省讀書固辭不獲既至又詔以迪功郎入省
理宗立轉脩職郎差幹辦浙西安撫司經畫悉當以
疾乞致仕所著有易提綱諸經雜說

劉伯正字直卿餘干人舉進士歷浙西轉運司靜重

不求名譽善藏其用後以資政殿學士提舉洞霄宮

徐榮叟字茂翁嘉定七年進士通判臨安府遷知婺
州深悉民隱善政著聞入爲諫議大夫後以資政殿
大學士致仕

王埜字子文婺州人介之子也嘉定十二年進士淳
祐間歷官兩浙轉運判官以訪察使出視江防首嘉
興至京口增脩官民兵船守險備具江上晏然寶祐
二年拜端明殿學士與宰相不合言者攻之主管洞
霄宮

李信甫南劍人侗之子也舉進士歷監察御史出知衢州善政善教不忝家學擢廣東江東憲以特立不容于朝罷去

三邁字貫之仙游人嘉定十年進士調浙西安撫司幹官考廷試詳定官王元春欲私所親邁顯擯其繆元春嗾諫官李知孝誣論之免官調睦宗院教授淳祐改元右正言江萬里袖疏榻前曰邁之才可惜不卽召將有老不及之歎上以爲然有尼之者遂止詹體仁字元善建寧浦城人提舉浙西常平初體仁使浙右時蘇師旦以胥吏執役後倚韓侂冑

位至是遣使通問體仁曰小人乘君子之器禍至無日矣烏得以污我未幾果敗

徐僑字崇甫義烏人從呂祖謙朱熹游開禧和戎僑適以謁選留京陳所以折虜之策留爲京學教授僑竟從選部授睦州觀察推官至郡多所裨贊事有不**可必**反復論評不爲矯激雖異已者久益知敬後仕至工部侍郎

趙與憲字德淵藝祖十世孫居湖州嘉定十三年進士歷知嘉興慶元浙西提點刑獄浙東西安撫司提舉常平知紹興臨安所至敏于幹辦急于財利俗以

能稱而君子謂其爲聚歛之臣云

江通志卷三十一

江通志卷三十二

官師志第五之十二

汪綱字仲舉黟縣人知蘭溪決摘如神歲旱郡倚辦
勸分綱謂勸分所以助義倉一切行之非所謂安富
恤貧也願假常平錢爲糶本使得循環迭濟又躬勸
富民浚築塘堰大興水利饑者得食其力繼擢直秘
閣知婺州改提點浙東刑獄慮囚至婺有奴挾刃欲
戕其主不遇而殺其子獄卒牽連綱徑出奴斬之釋
囚之寃者禱雨龍瑞宮有物蜿蜒盤旋壇上綱曰吾
欲雨而已毋爲異以惑衆言未竟雷雨大至歲大熟

進直煥章閣知紹興府主管浙東安撫司公事兼提
點刑獄訪民瘼罷行尤切蕭山諸暨諸縣修築運河
疏通湖蕩防禦江海經理詳密甚爲民利理宗卽位
詔加集英殿修撰寶謨閣待制復命寶慶三年大水
綱發粟三萬八千餘緡錢五萬賑之蠲租六萬餘石
疲瘠頓蘇無異常歲越有經總制稅名四十二萬其
中二十五則紹興以來虛額也前後帥懼負殿以修
奉攢宮之資僞增焉綱謂負殿之責小罔上之罪大
撫其實以聞詔免九萬五千緡而宿敝因是著明矣
紹定元年召赴行在綱入見言臣下先利之心過於

狗彘爲身之計過於謀國媮惰退縮奔競貪黷相與
爲欺宜有以轉移之帝曰聞卿治行甚美越中民力
如何對曰去歲水潦諸暨爲甚今歲幸中熟十年之
間千里晏起皆朝廷威德所及臣何力之有權戶部
侍郎越數月上章致仕及卒越人聞之皆墮淚相率
而哭所著有恕齋集左帑志漫存錄

胡渠寶慶中知慶元府措置有方於水利尤盡心立
水則刊平字於石爲啓閉之準民皆德之

陳仲微海鹽丞鄰邑有疑獄十年不決郡將命仲微
按之一問立決

黃師雍字子敬福州人少從黃翰學寶慶初進士爲
婺州教授有文學名知龍溪縣有最行拜監察御史
劾罷史嵩之終禮部侍郎簡澹寡欲靜厚有守於邪
正之辨甚明愛護名節云

趙宗潔字敏則括蒼人舉進士授浙西常平提舉入
爲右司郎官每以人才爲宰相薦理宗朝中貴盧必
升董宋臣專權用事在朝無一人敢言者宗潔奏乞
罷斥之以肅官府紀綱由是名振朝野居官不受私
謁所至以激揚清濁著聲

李宗勉字彊父富陽人開禧進士寶慶初通判嘉興
遷知台州嘉熙二年叅知政事敵勢彊盛史嵩之開
督府方主和議宗勉獨疑之爲相守法度抑僥倖不
私親黨召用老成樂聞讜言趙汝騰嘗以宗勉爲公
清之相卒謚文清

樓演鄞縣人寶慶中知崇德有吏能究極弊端疏刷
之

馬光祖字華父金華人寶慶二年進士歷知處州遷
浙東提舉常平浙西提點刑獄拜戶部尚書兼知臨
安府浙西安撫使所至練兵豐財百廢脩舉可謂能
臣但依附史嵩之奪情起復不免爲劉漢弼所論云

吳興祖紹定元年爲平陽主簿肅恭明銳留心政事
一邑藉之脩理學校延諸生講校經難文義彬彬士
皆奮發

趙希磐紹定中知餘杭爲政清靜邑里安謐撤新縣
治不勞民而成

鄭汝岡字山甫括蒼人以父蔭爲金華令歷守衢婺
二州一以簡靜爲治入朝爲吏部侍郎紹定六年劔
寇猖獗聲撼未嘉邑糴告竭汝岡移書廟堂通浙東
港禁及置惠民倉民感其德相率繪像祀之

孫夢觀字守叔慈溪人寶慶二年進士調浙西提舉

公事尋通判嚴州歷知嘉興府所至蠲租稅
省刑罰有古循吏之風

趙必愿字立夫以大父汝愚遺表補承務郎嘉定七
年舉進士歷知處婺台諸州一循大父之政紹定中
以汝愚配享寧宗從必愿請也必愿平易以近民忠
信以厚俗尤留意武事措處海道居官累乞歸皆不
許卒贈銀青光祿大夫蓋其蚤聞家庭忠孝之訓師
友正大之言故所立卓然可稱云

吳潛字毅夫宣州寧國人修撰柔勝之季之嘉定進
士紹定四年都城火潛上疏論致災之由在于宦官

女寵復貽書史彌遠論格心六事時議收復河南潛告執政曰金人既滅與北爲鄰法當以和爲形以守爲實以戰爲應淳祐十一年參知政事拜右丞相又四年拜特進左丞相進封慶國公時元兵已渡江矣潛以吏部尚書知臨安府上論艱屯蹇困之時宜反身脩德以求亨通之理寶祐四年判慶元初潛論國家安危治亂之原參章鑑高鑄丁大全蕭泰來沈炎趙與憲等罪惡不報卒以沈炎論劾落職潛死之且風雷大作撰遺表作詩頌端坐而逝時景定三年五月也追贈少師

重珍字良貴無錫人嘉定十六年進士第一紹定二年召入對首以自天子至於庶人所當先知者本心外物二者界限明則知有天下治亂而已何樂其尊知有生民休戚而已何樂其奉且論苞苴有昔所未有之物故吾民罹昔所未有之害苞苴有不可勝窮之費故吾民有不可勝窮之憂以集英殿脩撰知安吉州權刑部侍郎三辭不許自劾其不能取信朝廷之罪乞鑄置閒散促覲愈力而疾不可起詔守刑部侍郎致仕卒謚忠文

趙希暨紹定中爲昌化令仁厚愛民時有徵楮漆於

民希暨為劄論之極言邑民生理之薄遂罷徵

高斯得字不妄少從李坤臣學坤臣瞽斯得左右扶持之紹定二年舉進士授利州路推官辟為史館檢閱分脩光寧二帝紀時史嵩之柄國斯得上言乞擇才並相由是忤嵩之意添差通判紹興府淳熙二年四朝帝紀書成嵩之勦入邪說踰年調台州通判杜範入相召為太常博士應詔上封事復極論嵩之遂出知嚴州值歲旱斯得蠲租發廩招糴勸分請于朝得米萬石以賑濟民始獲蘇遷浙東提點刑獄劾知處州趙善瀚劾知台州沈璽等七人倚勢厲民疏上

不報斯得具辭免

胡穎字叔獻潭州人紹定進士正直剛果博學彊記吐辭成文書判下筆千言援據經史切當事情歷官浙西提刑榮王府十二人行劫穎悉斬之一日論對理宗曰聞卿好殺意在折獄穎曰臣不敢屈太祖之法以負陛下非嗜殺也帝為之默然

孫子秀字元實餘姚人紹定進士調吳縣主簿滁州教授改知金壇在有善政遷慶元通判主管浙東鹽事奏蠲附鹽衢州寇作及水冑城郭屬子秀治之盜息水平歷遷浙東提刑兼知婺州婺多勢家有田連

阡陌而無稅者子秀悉覈其田以均稅又爲浙西堤
刑冒暑周行郡縣獄爲之清安吉州有婦女愬人殺
其夫與二僕逮繫者考掠莫得其實子秀密訪之乃
婦女賂宗室子殺其夫僕救之并殺以滅口一問卽
伏遠近稱神明後進太常少卿兼知臨安以言罷
呂沆字叔朝以恩補將仕郎端平三年銓試第一授
黃巖縣主簿改知於潛縣先是重囚越獄聞沆至自
歸遷通判婺州朱君章訟田四十有二年吳王府爭
墓二十有九年沆皆決之特差克提領兩浙轉運
事使司主管文字沆皆處置得宜甚有能聲

陳叔端平間爲新城令時民困于茶租錢取請于朝
特蠲二千八百貫不強其所無以舒民力

喬行簡字壽朋東陽人呂祖謙門人也舉進士歷官
淮西轉運判官知嘉興府行簡歷練老成識量弘遠
居官無所不閑好薦士多至顯達後歷官平章軍國
事封肅國公

趙汝滢宗室子嘉熙元年以奉議郎知桐廬縣發縣
帑五千緡增置學田養士又創屋三楹於常平倉後
捐已俸糶豐糶歉名曰惠民倉邑人便之

常挺字方叔福州人嘉熙二年進士歷官考功郎官

出知衢州拜監察御史兼崇政殿說書疏言邊闖三
事曰辟實才曰奏實功曰招實兵朝廷二事曰選良
吏曰擢正人又言願陛下深思宏遠之規模奮發清
明之志氣立綱陳紀必爲萬世之法程昭德塞違以
示百官之憲度遷太常少卿兼國子司業
王萬字處一家世婺州父遊淮上萬因生長濠州嘉
定十六年進士嘉熙中知台州至郡日惟蔬飯終日
坐廳事事至立斷吏無所售往往改業散去民亦化
之不復訟郡以大治

許子良字肖說東陽人嘉熙間舉進士年已五十餘
矣調餘姚簿未上用宰相喬行簡薦歷大學博士請
外出知饒州改知台州弊蠹相仍負上供錢三百餘
萬子良節縮凡典例所宜得者亦謝去居半載郡計
裕如子良聽訟據案與兩造相爾汝以察其情情既
得即決遣之同僚與吏無所容其私皆忌之吏白每
歲以錢折米二萬斛子良又不許而禁卒有不便者
於是嗾其毆獄吏以撼之且相與出危言子良知墮
計卽委印去子良性情清介不同流俗與人交極尚
風義赴急扶顛斧鉞在前弗顧然剛腸嫉惡面折人
過世多嚴憚其襟懷夷坦無纖芥含茹意則人鮮知

之但晚年遭忌謫官乃從賈似道之辟君子少焉
王似字元敬金華人淳祐元年以朝奉郎知睦州先
是嘉熙四年夏秋大旱及是春民食橡蕨不給路殍
相枕藉似下車首局厨傳節浮費一意救荒乞米於
朝勸分於鄉民賴以活既而脩州學行鄉飲新釣臺
書院次第舉行

虞玆陵陽人淳祐五年知淳安縣在任有惠政祠于
學宮

吳章淳祐中爲錢塘縣令南渡以來錢塘地多爲王
宮公府而稅賦尚存民以爲病章爲奏免尋通判臨

安府

程崇欽縣人淳祐進士歷大理寺丞出守台州抑絕
權豪甚有政聲先是府治後山妖狐變幻崇至潛伏
不見

常林字長孺臨邛人同之曾孫也淳祐七年進士調
婺州推官疏決滯訟以剽繁裁劇稱歷遷浙東安撫
使值水災捐萬楮以賑之會稽山陰死者暴露無以
爲殮造棺以給之召爲刑部侍郎平反僞獄全活甚
衆

季鏞字伯韶括蒼人淳祐十二年知睦州時大水被

九州闔闐爲壑壞公私廬舍無數民苦溺且饑鏞旣至虛已問俗首蠲私苗十六力請于朝寬京府摧糴之令發廩分賑捐抽解場木予被水之家未幾頓復舊觀民忘昏墊

劉晟字孟容莆田人進士淳祐中知青田明敏警悟吏不敢欺常以厚風俗崇教化爲先民懷其惠肖其像祠于義倉

張卽之字溫夫叅知政事孝伯之子以父恩授承務郎烏程丞寶祐四年制置使余晦入蜀以讒劾閩州守王惟忠沒入其貲下詔獄鍛鍊誣狀坐棄市惟忠

臨刑謂其友陳大方曰吾死當上懇于天七揮刀不入血流卽之雖閑居移書言於淮東制置使賈似道恤其遺孤又使從孫士倩娶惟忠孤女未幾似道入相中書舍人常挺亦以爲言景定元年給還首領以禮改葬多卽之倡義云卽之以能書聞天下金人尤寶其翰墨惟忠字肖尊慶元之鄞人嘉定十三年進士

皮龍榮字起霖醴陵人淳祐四年進士授諸王宮教授調知嘉興德政著聞召赴闕歷官叅知政事龍榮性抗直賈似道當國不肯降志咸淳元年以原官奉

祠御史陳宗禮林拾先後論劾削官一日上偶問龍
榮安在似道恐其召用又陰諷李雷應劾之徙衡州
居住

陳容三山人人呼爲陳所爭寶祐元年由太學生知
平陽縣簡易從容邑人化之時與名士論文講藝數
繹大義士習以興至於崇社稷關道路通溝洫議賑
糴民事備舉暇則游戲翰墨以畫龍名

丁大全字子萬鎮江人面藍色嘉熙二年進士調蕭
山尉有及民之政旋致改行寶祐間累官右丞相侍
御史沈炎右正言曹末年相繼論劾大全假刑威以

籍天下之口挾爵祿以籠天下之財竄置新州移徙
海島將官畢遷護送舟過藤州擠之於水而死

胡居仁永康人淳祐進士知台州文章政事冠絕一
時

葉夢鼎字鎮之寧海人以太學釋褐開慶七年同僉
書樞密院進封臨海郡公知慶元府兼沿海制置使
肅清海寇咸淳二年再召爲叅知政事時賈似道當
國動相牽制引疾力辭扁舟徑歸或以禍福告夢鼎
語之曰庶耻事大死生事小萬無可回之理端宗即
位于閩召爲少師海道梗塞不能進南向慟哭失聲

尋卒

劉良貴臨安知府也景定四年賈似道以國計日困思變法而未得其說良貴與浙西轉運使吳世卿獻買公田之策詔從之以良貴爲提領恣爲操切浙中大擾民之破家失業者甚衆官吏有奉行不至者良貴輒劾之追毀出身永不收敘由是有司爭以多買爲功似道又以陳訐往秀湖廖邦傑往常潤催督各郡買田有專官嘉興則潘墀李補焦煥炎安一曰則謝奕趙與訔王唐珪馬元演平江則包恢成公策常州則洪穗劉子庚鎮江則章垌郭夢熊江陰則楊班黃

似道在平江至以肉刑從事邦傑在常州害民特甚至有本無田而以歸併抑買自經者由是浙西六郡買田三百五十餘萬畝詔進良貴官兩轉餘人進秩有差

吳勢卿初知處州救荒有法時松陽盜起率民兵平之尤留心學校訓淑諸生處人德之及遷浙西轉運使乃與劉良貴諂賈似道獻買公田之策自是殃民誤國雖有小善不足贖云

包恢字宏父建昌人自其父叔從朱熹陸九淵學恢少爲諸父講大學其言高明諸父驚焉嘉定間舉進

士歷官臨安府知台州浙西提點刑獄所至破豪猾
去姦吏治蠹獄課益鹽政聲赫然又嘗因論對以惻
憫之心啓其君若有得于體用之學者後乃逢迎賈
相督買公田至以獄刑從事徼榮干進舉平生而盡
棄之富貴之溺人也如此

趙景緯字德父於潛人弱冠得周惇頥程顥兄弟諸
書讀之恨不及登其門朱熹門人葉味道謂之曰度
正吾黨中第一人遂往見首誨以求放心爲本由是
往來葉度之間研索益精登淳祐進士景定中以秘
書郎知台州至郡以化民成俗爲先務民甚德之咸

淳初徙知嘉興護根本正風俗嘗上疏乞歸田
於赤城桐栢之間采藥著書庶幾有補後學使
之身不爲無用於世不許遷宗正少卿侍緝熙殿以
易進講論聖人體元之妙在惟幾有疾謝醫却藥曰
使我清心以順天命毋重惱我懷拱手三揖乃卒謚
文安

汪立信六安人淳祐進士理宗見立信狀貌曰此間
帥才也荆湖制置趙葵辟充參議官葵去而馬光祖
代之光祖欲迎合賈似道擯摞葵事立信爭之光祖
怒立信遂自投劾去景定元年起權知常州兼浙西

提點刑獄卽嘉興治所講行荒政後爲京湖制置使
襄陽被圍危急立信上疏三策其畧曰內郡何事乎
多兵宜盡出之江干分屯列戍戰守並用互相應援
選大臣忠良有幹用者立爲統制此上策也又拘聘
使郝經無益於我請禮而歸之以緩師期用圖戰守
此中策也二策不行衝壁輿觀之禮請備以俟似道
得書大怒抵之地詎曰陪賊狂言敢爾咸淳十年元
兵入寇似道督諸軍出次江上以立信爲沿江制置
使卽日上道以妻子託愛將金明執其手曰我不負
國家爾亦必不負我遂行與似道遇蕪湖似道拊

信背哭曰不用公言以至於此似道師潰蕪湖江漢
守臣皆望風降遜立信嘆曰吾今日猶得死於宋土
也廼召賓佐與訣手爲表起居三宮夜分起步庭中
慷慨悲歌扼吭而卒子麟不肯從衆降元崎嶇走遁
以死

馬廷鸞字翔仲饒州樂平人甘貧力學里人聘爲童
子師遇有酒食則念母藜藿不給食不下咽登淳祐
七年進士歷觀文殿大學士知紹興府浙東安撫大
使上疏辭免依舊職提舉臨安府洞霄宮度宗五年
以廷鸞爲右丞相賈似道疑其異已黥堂吏以泄其

憤廷鸞力辭相位帝曰丞相勉爲朕留廷鸞言臣死
亡無日恐不得再見君父然國事方殷疆圉孔棘天
下安危人主不知國家利害群臣不知軍前勝負列
闕不知陛下與元老大臣惟懷永圖臣死且瞑目頓
首涕泣而退所著有六經集傳語孟會編楚辭補記
洙泗齋編讀莊筆記張氏祝氏皇極觀物外篇諸書
李雷奮字震卿礪陽人咸淳中知處州在郡庶謹捐
已俸剏造郡學講堂士人立祠于學祀之
張震知嚴州州舊有章惇祠震即命毀去而以范仲
淹易之

吳名揚金谿人咸淳中進士歷官浙西制幹文天祥
招徠天下士名揚與焉後奏除兵禮二部架閣踴躍
赴義意氣感激傾動一時

李謙贛州人咸淳間舉進士爲安福縣尉獲盜不願
受賞後爲浙東提舉值歲饑賑濟活人甚多

曾子良臨川人咸淳末知淳安縣清慎自守時邊事
已急多方保障民賴以安後以讒籍其家惟故書敗
絮而已君子惜之

孫潼發桐廬人咸淳進士授衢州軍事判官有廉能
聲辟御前軍器所幹辦公事未幾宋亡家亦毀乃避

地萬山中元侍御史程鉅夫以遺發應詔辭弗起
趙與檣宗室子也家信安咸淳元年以奉議郎知建
德縣民以旱澇告遂請於朝得粟一萬斛以濟尋遷
判建德府暨解任以所積俸錢併堂饌直役錢預爲
建德縣人戶代輸咸淳四年茶租其救荒之政民尤
蒙其惠

鄭虎臣德祐初爲會稽縣尉時三學生及臺諫侍從
皆上疏乞誅賈似道詔責授似道高州團練副使循
州安置遣虎臣監押之貶所虎臣以其父嘗爲似道
所配欣然請行似道時寓建寧開元寺侍妾尚數十

人虎臣至悉屏去暴似道行秋日中令輿夫唱杭州
歌謔之每名叱似道窘辱備至一日入古寺壁間有
吳潛南行所題字虎臣呼似道曰賈團練吳丞相何
以至此似道慚不能對及抵清漳漳守趙分如似道
門客也宴虎臣欲請似道偶坐虎臣不許似道亦固
讓不敢當口稱天使唯謹宴畢虎臣促似道行離城
五里憇木繡庵似道知不免遂自服毒虎臣曰好教
汝恁自爲之槌數下而絕

趙良淳字景程餘干人汝愚曾孫也宋末知安吉州
歲饑民聚爲盜或請以兵擊之良淳曰時艱故剽掠

苟活耳民豈樂爲盜哉乃以義諭之衆皆散歸德祐
二年元兵陷城良序知事不可爲與其妻雍氏同縊
死于郡治之集芳軒長子載孫亦赴水死

陳天瑞公輔之後師事金華王栢明性理之學志潔
而行廉爲金華令有能名宋末隱遜林壑詩文極高
古效淵明止書甲子不稱元號有文集五十卷

徐道隆字伯謙武義人父煥知南雄道隆以任入官
歷遷提點浙西刑獄時元兵至臨平道隆率勤王兵
間道由臨湖門乘舟入援德祐二年追兵及之軍士
殊死戰道隆與其子俱赴水死

張世傑范陽人少隸淮兵中無所知名阮思聰見而
奇之言之呂文德召爲小校累功進沿江招討使改
制置副使元兵至獨松關召文天祥入衛以世傑爲
浙西保度軍節度使知平江尋亦召入衛德祐二年
正月元兵迫臨安世傑請移三宮入海而與天祥合
兵背城一戰丞相陳宜中方遣人請和未幾元兵至
臯亭山世傑乃提兵入定海石國英遣都統卞彪說
之使降世傑大怒斷其舌磔之巾子山祥與元年二
月元將張弘範襲厓山世傑力戰兵潰復收兵至海
陵山舟覆死之

陳繼周字碩卿寧都人淳祐三年貢于鄉以捕盜功歷江東提點刑獄幹辦公事咸淳十年詔徵勤王文天祥方守贛州即日舉兵造繼周問計繼周慨然爲具言閭里豪傑子弟與凡起兵之處其爲方畧甚詳於是授繼周江西安撫司準備差遣率贛士以從詔改江浙制置司主管機宜所部夜襲元兵於南柵門殺傷相當質明猶戰力竭赴水死

家鉉翁眉州人以廕補官知常州政譽赫然遷浙東提點刑獄充紹興府長史進樞密都丞旨兼知臨海進士出身拜端明殿學士當元兵次近郊丞相吳

堅賈餘慶檄普天下守令以城降鉉翁獨不署元帥欲縛鉉翁鉉翁曰中書省無縛執政之理堅奉表祈請于元以鉉翁往禮成不遣留館中聞宋亡旦夕哭泣元欲尊官之以示南服鉉翁不屈自稱奉使無狀不能感動元主以存故國言輒流涕文天祥女弟坐繫鉉翁傾裝贖出之改館河間以春秋教授弟子數爲諸生談宋興亡之故流涕太息不已元成宗卽位放還錫資金帛皆不受自號宋處士數年以壽終文天祥字宋瑞吉水人年二十舉進士第一開慶初元兵南侵宦官董朱臣說上遷都人莫敢議其非者

天祥時爲寧海節度判官上書乞斬之以一人心買
似道稱病乞致仕天祥以爲要君似道使臺臣張志
立劾罷之咸淳九年起爲湖南提刑十年改知贛州
德祐初江上報急詔天下勤王天祥捧詔涕泣帥師
至臨安元兵已據臯亭山時宋已降元以天祥爲樞
密使如元軍請和與元伯顏抗論拘之天祥至真州
夜亡自揚州東入海至高郵汎海至溫州入福州拜
右丞相乞太后命二王鎮閩廣以呂興復尋兵敗于
方石嶺妻屬俱被執天祥逸去收殘兵奔循州駐南
嶺元張弘範兵突至天祥被執至潮陽見弘範弘範

禮見之與俱入崖山使爲書招世傑索之圖乃
書過零丁洋詩與之其末有云人生自古誰無死留
取丹心照汗青崖山破弘範置酒大會曰國亡丞相
忠孝盡矣能改心以事宋者事元將不失爲宰相也
天祥泣曰國亡不能抹爲人臣者死有餘罪况敢逃
死而二其心乎弘範義之遣使護送至燕京天祥在
道不食八日不死至燕館供帳甚盛天祥不寢處坐
達旦遂移兵馬司設卒以守之歷三年元世祖知其
終不屈欲釋之不果尋有變召入諭之曰汝何願天
祥對曰天祥受宋恩爲宰相安事二姓願賜一死足

矣言者力贊從其請俄有詔止之天祥死矣天祥臨
刑從容南向再拜而死妻歐陽氏收其屍面如生年
四十七其衣帶有贊曰孔曰成仁孟曰取義惟其義
盡所以仁至讀聖賢書所學何事而今而後庶幾無
愧

嘗觀昔人有言曰爵任之於人重矣懷祿以圖存者
士子之恒情審能而就列者出身之常體夫紆於物
則非已直於志則犯俗辭其艱則乖義徇其節則亡
身余志浙官司自周漢歷唐以至於宋大都不出于
此以次列之據事直書不為區別涇渭並流清濁

乃見其諸善不足為勸惡不為戒者則固在畧
也嗚呼一時之榮貴固與其皆往矣千百世之公
評則尚若有存焉者此哲人所以明慎于所受之分
遲遲于岐路之間也

四

...

